

UNIVERZITET U SARAJEVU – PRAVNI FAKULTET

**KOMISIJA ZA IZBOR NASTAVNIKA/ICE U ZVANJE REDOVNOG PROFESORA/ICE
NA NAUČNOJ OBLASTI GRAĐANSKO PRAVO I GRAĐANSKO PROCESNO PRAVO**

VIJEĆU UNIVERZITETA U SARAJEVU - PRAVNOG FAKULTETA

Sarajevo, 22.09.2025. godine

PREDMET: Izvještaj s prijedlogom za izbor u akademsko zvanje redovni/a profesor/ica na naučnoj oblasti Građansko pravo i građansko procesno pravo

I. Podaci o objavljenom konkursu i formiranju Komisije

Na osnovu čl. 121, a u vezi s čl. 176 Zakona o visokom obrazovanju Kantona Sarajevo („Službene novine Kantona Sarajevo“, br. 36/22) (dalje: ZVO 2022), čl. 233 i 234 Statuta Univerziteta u Sarajevu broj: 01-14-35-1/23 od 26.07.2023. godine (dalje: Statut), Odluke Senata Univerziteta u Sarajevu broj: 01-7-18/25 od 28.05.2025. godine, a u skladu s Odlukom o usvajanju dinamičkog plana potreba Univerziteta u Sarajevu – Pravnog fakulteta za raspisivanjem konkursa za izbor u zvanja u akademskoj 2024/2025 godini broj: 01-1160/24 od 04.09.2024. godine i Odlukom o dopuni Odluke o usvajanju dinamičkog plana potreba Univerziteta u Sarajevu – Pravnog fakulteta za raspisivanjem konkursa za izbor u zvanje u akademskoj 2024/2025. godini broj: 01-235-1/25 od 05.03.2025. godine, Univerzitet u Sarajevu – Pravni fakultet raspisao je konkurs za izbor u akademsko zvanje **nastavnik/ica u zvanje redovnog/e profesora/ice na naučnoj oblasti Građansko pravo i građansko procesno pravo**, jedan izvršilac, puno radno vrijeme.

Konkurs je objavljen 20.06.2025. godine u dnevnom listu „Dnevni avaz“, na službenoj internetskoj stranici Pravnog fakulteta (www.pfsa.unsa.ba) i na službenoj internetskoj stranici Univerziteta u Sarajevu (www.unsa.ba).

Nakon isteka roka za prijave na Konkurs, na osnovu čl. 123 ZVO 2022 i čl. 236 Statuta, Vijeće Pravnog fakulteta u Sarajevu (dalje: Fakultet) je na 91. (elektronskoj) sjednici, održanoj 18.07.2025. godine, donijelo Odluku o imenovanju Komisije za izbor jednog/e nastavnika/ice u

zvanje redovnog/e profesora/ice na naučnoj oblasti Građansko pravo i građansko procesno pravo
br: 01-841-1/25 od 18.07.2025. godine u sastavu:

- dr. Abedin Bikić, redovni profesor Pravnog fakulteta Univerziteta u Sarajevu na predmetima naučne oblasti Građansko pravo i građansko procesno pravo, predsjednik i član;
- dr. Meliha Povlakić, redovna profesorica Pravnog fakulteta Univerziteta u Sarajevu na predmetima naučne oblasti Građansko pravo i građansko procesno pravo, članica i
- dr. Zinka Grbo, redovna profesorica Pravnog fakulteta Univerziteta u Sarajevu na predmetima naučne oblasti Trgovačko pravo i pravo privrednih društava, članica.

Navedenom je Odlukom utvrđeno da je zadatak Komisije da pisani Izvještaj s prijedlogom za izbor u akademska zvanja dostavi Nastavno-naučnom vijeću u roku od 30 dana od dana imenovanja.

U skladu s odredbom čl. 256 st. 1 i 2 Statuta Komisija je 03.09.2025. godine održala konstituirajuću sjednicu na kojoj je usvojila Poslovnik o radu, te uz prisustvo predstavnika Stručne službe Fakulteta otvorila pristigle prijave. Na raspisani konkurs pristigla je jedna prijava, koju je podnijela dr. Almedina Šabić Učanbarlić, vanredna profesorica Univerziteta u Sarajevu – Pravnog fakulteta na naučnoj oblasti Građansko pravo i građansko procesno pravo.

Uvidom u prijavu dr. Almedine Šabić Učanbarlić Stručna služba fakulteta je konstatairala da je kandidatkinja uz svojeručno potpisanu prijavu na konkurs predala sljedeće dokumente:

1. biografiju sa bibliografijom – akademski *curriculum vitae*;
2. ovjerenu kopiju diplome o sticanju naučnog stepena doktora pravnih nauka;
3. ovjerenu kopiju diplome o sticanju naučnog stepena magistra pravnih nauka;
4. ovjerenu kopiju diplome o završenom studiju za sticanje visoke stručne spreme;
5. ovjerenu kopiju diplome o postignutom odličnom uspjehu tokom studija na Pravnom fakultetu u Sarajevu;
6. potvrdu dekanice Univerziteta u Sarajevu – Pravnog fakulteta o radnopravnom statusu (radni odnos s punim radnim vremenom);
7. odluku Senata Univerziteta u Sarajevu o izboru u zvanje vanredne profesorice;
8. listu objavljenih knjiga i naučnih radova od izbora u zvanje vanredne profesorice, kao i same knjige i kopije radova;

9. podatke i dokaze o uspješnim mentorstvima: pri izradi i odbrani sedam (7) završnih radova na II ciklusu studija Univerziteta u Sarajevu – Pravnog fakulteta, te pri izradi i odbrani jedne (1) doktorske disertacije na III ciklusu Univerziteta u Sarajevu – Pravnog fakulteta;
10. dodatnu dokumentaciju kojom se dokazuje postignute rezultate u oblasti naučnog i nastavnog rada, te doprinos procesu internacionalizacije i društveni doprinos.

U skladu s odredbom čl. 256 st. 2 Statuta izdata je Potvrda o potpunosti (urednosti) prijave dr. Almedine Šabić Učanbarlić na konkurs za izbor jednog/e nastavnika/ice u zvanje redovnog profesora/ice na naučnoj oblasti Građansko pravo i građansko procesno pravo broj: 01-812-3/25 od 03.09.2025. godine, kojom se konstatira da je podnesena prijava shodno raspisanom konkursu 1) blagovremena (podnesena u roku navedenom u konkursu), 2) potpuna (podneseni svi dokazi o ispunjenosti uslova za izbor u zvanje redovnog/e profesora/ice), te da je vlastoručno potpisana od strane podnositeljice.

Nakon što je razmotrila podnesenu prijavu i uz nju priloženu dokumentaciju, Komisija podnosi sljedeći

I Z V J E Š T A J

1. Uslovi za izbor u akademsko zvanje redovni/a profesor/ica na Univerzitetu u Sarajevu

Dr. Almedina Šabić Učanbarlić konkurirala je za izbor u zvanje redovne profesorice na naučnoj oblasti Građansko pravo i građansko procesno pravo. U skladu s odredbom čl. 176 ZVO 2022, članovi akademskog osoblja koji su izabrani u akademsko zvanje prema odredbama zakona koji prestaje važiti, njegovim stupanjem na snagu zadržavaju pravo da budu izabrani u isto ili više akademsko zvanje prema uslovima propisanim ranijim zakonom. Ovo pravo važi samo za jedan izborni period u isto ili više akademsko zvanje. U skladu s odredbom stava 3 ovog člana, visokoškolska ustanova odnosno članica raspisuje tek sljedeći konkurs za izbor u zvanje u skladu s novim zakonom, te je predmetni konkurs raspisan u skladu s odredbama Zakona o visokom obrazovanju Kantona Sarajevo iz 2017. godine (dalje: ZVO 2017) („Službene novine Kantona Sarajevo“, br. 33/2017, 35/2020, 40/2020, 39/21) odnosno u skladu s uslovima za izbor u zvanje vanrednog/e profesora/ice koji su bili propisani čl. 96 st. 1 tač. f) tog Zakona.

Odredbom čl. 96 st. 1 tač. f) ZVO 2017 propisani su sljedeći uslovi za izbor u akademsko zvanje redovni/a profesor/ica:

- proveden najmanje jedan izborni period u zvanju vanrednog profesora;
- najmanje osam naučnih radova objavljenih u priznatim publikacijama koje se nalaze u relevantnim naučnim bazama podataka;
- najmanje dvije objavljene knjige;
- originalni stručni uspjeh kao što je projekt, patent ili originalni metod;
- uspješno mentorstvo najmanje po jednog kandidata za stepen drugog odnosno integriranog ciklusa studija i trećeg ciklusa studija.

2. Biografski i podaci o formalnom obrazovanju

Dr. Almedina Šabić Učanbarlić rođena je 28.05.1978. godine u Banjoj Luci, Bosna i Hercegovina. Osnovnu i srednju školu završila je u Sanskom Mostu i Saveznoj Republici Njemačkoj.

Studij na Pravnom fakultetu u Sarajevu upisala je 1998. godine, te ga je s odličnim uspjehom okončala 2002. godine.

U junu 2005. godine položila je pravosudni ispit pri Federalnom ministarstvu pravde.

Odbranom magistarske teze pod naslovom „Nepoštene klauzule u obligacionim ugovorima“ u aprilu 2010. godine okončala je magistarski studij na Pravnom fakultet u Sarajevu.

Naučni stepen doktora pravnih nauka stekla je na Pravnom fakultetu u Sarajevu 16.09.2014. godine, odbranom doktorske disertacije pod naslovom „Prava kupca stvari s materijalnim nedostatkom“.

Kandidatkinja govori dva jezika, njemački i engleski, što joj omogućava da piše i predaje na tim jezicima.

3. Podaci o radnom iskustvu

Nakon okončanja studija na Pravnom fakultet u Sarajevu, kandidatkinja se zaposlila kao pripravnik na Općinskom sudu u Sarajevu (2003. – 2005.).

U zvanje asistentice izabrana je 2005. godine, a u zvanje više asistentice 2011. godine, da bi u zvanje docentice na naučnoj oblasti Građansko pravo i građansko procesno pravo bila izabrana 25.02.2015. godine.

Kandidatkinja je u zvanje vanredne profesorice na naučnoj oblasti Građansko pravo i građansko procesno pravo izabrana 27.11.2019. godine.

Pored angažmana na Fakultetu, kandidatkinja je angažirana kao stalna edukatorica pri Centru za edukaciju sudija i tužilaca Federacije Bosne i Hercegovine (obligaciono pravo i pravo zaštite potrošača), arbitražna je sutkinja na listi arbitara Arbitražnog suda pri Vanjskotrgovinskoj komori/Spoljnotrgovinskog komori Bosne i Hercegovine za sporove u kojima bar jedna od stranaka ima sjedište odnosno prebivalište na teritoriji druge države, te za sporove u kojima strane imaju prebivalište na teritoriji Bosne i Hercegovine. Stalna je edukatorica u okviru priprema za polaganje pravosudnog ispita na nivou Bosne i Hercegovine i članica Stručnog povjerenstva za utvrđivanje identiteta intelektualnog vlasništva, procjene vrijednosti intelektualnog vlasništva i visine štete nastale na intelektualnom vlasništvu pri Federalnom ministarstvu pravde.

4. Stručno i naučno usavršavanje

Kandidatkinja se kontinirano naučno i stručno usavršavala u okviru studijskih boravaka u inostranstvu, te različitih edukacija, a učesnica je i niza međunarodnih i domaćih naučnih i stručnih skupova. U tom je smislu bila nositeljica naučnoistraživačke stipendije DAAD na Institutu za inostrano i međunarodno privatno i privredno pravo u Heidelbergu (Institut für ausländisches und internationales Privat- und Wirtschaftsrecht Heidelberg - 01.10.-31.12.2008. godine), nositeljica naučnoistraživačke stipendije DAAD na Otvorenom univerzitetu u Berlinu (Freie Universität Berlin - 08.09.-08.10.2009. godine), nositeljica naučnoistraživačke stipendije u okviru programa Erasmus Mundus Action 2-Basileus na Institutu za inostrano i međunarodno privatno i privredno

pravo u Heidelbergu (Institut für ausländisches und internationales Privat- und Wirtschaftsrecht Heidelberg – 01.10.-31.10.2011. godine), te nositeljica naučnoistraživačke stipendije DAAD na Institutu za njemačko, evropsko i međunarodno medicinsko pravo, zdravstveno pravo i bioetiku Univerziteta u Heidelbergu i Mannheimu (Institut für Deutsches, Europäisches und Internationales Medizinrecht, Gesundheitsrecht und Bioethik der Universitäten Heidelberg und Mannheim - decembar 2012. godine).

Kandidatkinja je u januaru i februaru 2023. godine uspješno završila obuku na teme: *Vještine mentorisanja, Interaktivne metode podučavanja i IT aplikacije u podučavanju* u okviru projekta DigiEdu, organiziranog od strane Univerziteta u Sarajevu.

Nakon što je izabrana u zvanje vanredne profesorice, kandidatkinja je sudjelovala u radu niza naučnih i stručnih konferencija, među kojima je izdvojila sljedeće:

- 13.12.2024. godine, koautorstvo s prof. dr. Anitom Petrović, **Umjetna inteligencija i rizici za potrošača: Odgovornost za zavaravajuće informiranje od strane chatbotova**, u okviru Međunarodne naučne konferencije "Bosna i Hercegovina i europske integracije", panel "Suvremene tendencije u razvoju građanskog prava i europske integracije";
- 13. i 14.05.2024. godine, **Digitalizacija i zaštita potrošača na primjeru odgovornosti za materijalne nedostatke kod ugovora o prodaji: Problem implementacije Direktive EU/2019/771 u zakonodavstvo BiH**, u okviru Međunarodne interdisciplinarnе naučne konferencije "Nepovratna digitalizacija društva – Tehnokultura", Univerzitet u Sarajevu – Fakultet političkih nauka;
- 08.11.2023. godine, **Učinkovita zaštita osiguranika pojedinca u ugovorima o osiguranju – dohvatljivi cilj ili tek ideal?**, u okviru panela "Ugovor o osiguranju – Postoji li idealno?", Univerzitet u Sarajevu – Pravni fakultet;
- 03.06.2023. godine, **Šta donosi novi Prijedlog Direktive Evropskog parlamenta i Vijeća o odgovornosti za neispravne proizvode i šta to znači za Bosnu i Hercegovinu?**, u okviru Međunarodnog naučnog skupa "Izazovi i perspektive razvoja pravnih sistema u XXI vijeku", Pravni fakultet Univerziteta u Banjoj Luci;
- 28-30.09.2022. godine, **Influence of Germanic legal systems on the legislation of Bosnia and Herzegovina regulating contract on donation – selected issues**, u okviru 2nd

Zagreb International Conference on the Law on Obligations, Ekonomski fakultet Sveučilišta u Zagrebu;

- 09. i 10.06.2022. godine, **Obaveza ispunjenja ugovora u uslovima pandemije virusom SARS – CoV – 2**, u okviru Međunarodnog savjetovanja Aktualnosti građanskog i trgovačkog zakonodavstva i pravne prakse, Pravni fakultet Sveučilišta u Mostaru.

5. Naučni radovi objavljeni u priznatim publikacijama koje se nalaze u relevantnim naučnim bazama podataka

5.1. Knjige i radovi koji su objavljeni prije izbora u zvanje vanredne profesorice

Knjige:

- "Kako riješiti obligacionopravni slučaj? – Praktikum za obligaciono pravo, Pravni fakultet Univerziteta u Sarajevu, 2006., (u koautorstvu sa: Bikić Abedinom i Bikić Enesom), COBISS.BH-ID14594566;
- "Pravo zaštite potrošača Odabrane direktive i njihova implementacija u zakonodavstvo Bosne i Hercegovine", Univerzitet u Sarajevu – Pravni fakultet, Sarajevo, 2019., COBISS.BH-ID 27770630.

Naučni radovi:

- "Potrošački sporovi pred arbitražom, Godišnjak PF u Sarajevu", LXII 2019, str. 529-551;
- "Zaštita korisnika kredita kroz pravo na odustanak od ugovora i pravo na prijevremeno vraćanje kredita", Godišnjak PF u Sarajevu, LX 2017, str. 131-153;
- "Odgovornost prodavca za pravne nedostatke u ugovoru o prodaji" (koautorstvo s A. Bikić), Aktualnosti građanskog i trgovačkog zakonodavstva i pravne prakse, Zbornik radova sa petnaestog savjetovanja, Mostar, 2017, str. 228-247;

- "Garancija za ispravno funkcioniranje stvari u ugovoru o potrošačkoj prodaji", Revija za pravo i ekonomiju, godina 18, broj 1, Mostar, 2017, str. 367-386;
- "Prava kupca stvari s materijalnim nedostatkom u njemačkom pravu" Godišnjak PF u Sarajevu, LIX 2016, str. 363-391;
- "Zaključenje ugovora" (koautorstvo s A. Bikić), Aktualnosti građanskog i trgovačkog zakonodavstva i pravne prakse, Zbornik radova s četrnaestog savjetovanja, Mostar, 2016, str. 228-247;
- "Prava kupca stvari s nedostatkom saobraznosti prema Prijedlogu Uredbe Evropskog parlamenta i Vijeća o Zajedničkom evropskom pravu prodaje", Godišnjak PF u Sarajevu, LVIII 2015, str. 213-245;
- "Neki aspekti odnosa između Konvencije o međunarodnoj prodaji robe i Smjernice 1999/44/EZ o određenim aspektima prodaje potrošačke robe i garancijama za robu", Zbornik sa Međunarodne naučno-stručne konferencije "Izgradnja modernog pravnog sistema", Internacioanlni Burč univerzitet, Centar za društvena istraživanja, 2014, str. 263-287;
- Zaštita od nepoštenih ugovornih klauzula prema Prijedlogu Uredbe Evropskog parlamenta i Vijeća o zajedničkom evropskom pravu prodaje", Godišnjak PF u Sarajevu, LVII 2014, str. 211-237;
- "Smjernica o pravima potrošača – očuvanje statusa quo ili stvarni korak naprijed u razvoju prava zaštite potrošača?", Godišnjak PF u Sarajevu, LVI 2013, str. 115-137;
- "Medijacija u potrošačkim sporovima: zaštita potrošača u postupku medijacije ili zaštita potrošača od medijacije?", Godišnjak PF u Sarajevu, LV 2012, str. 407-423;
- "Sprječavanje buduće primjene nepoštenih ugovornih klauzula – apstraktni kontrolni postupak", Godišnjak PF u Sarajevu, LIV 2011, str. 349-373;
- "Ex officio kontrola nepoštenih ugovornih klauzula", Nova pravna revija, 1/2011, str. 77-81;
- "Zaštita od nepoštenih ugovornih klauzula: analiza konformiteta i usklađivanje domaćih s komunitarnim rješenjima", Godišnjak PF u Sarajevu, LIII 201, str. 463-489;

- "Ugovorno ustupanje potraživanja prema načelima europskog ugovornog prava i usporedba s rješenjima Zakona o obligacionim odnosima", Godišnjak PF u Sarajevu, LI 2008, str. 565-589;
- "Pravna priroda zakupca", Godišnjak PF u Sarajevu, L 2007, str. 523-547;
- "Zastarjelost potraživanja", Godišnjak PF u Sarajevu, XLIX 2006, str. 413-437

5.2. Naučni radovi objavljeni nakon izbora u zvanje vanredne profesorice

Kandidatkinja je dostavila **osam (8)** objavljenih radova, te potvrde da su **dva (2)** rada prihvaćena za objavljivanje.

- 1) **"Influence of the Germanic legal systems on the regulation of donation agreements in the legislation of Bosnia and Herzegovina: Selected issues"**, rad prihvaćen za objavljivanje kao poglavlje knjige "Germanic influences on Central and Southeast Europe", urednik Tot Ivan, izdavač Routledge, podnesena potvrda o prihvatanju rada od strane urednika, s potvrdom da će datum izdavanja biti u 2025. godini.

Kandidatkinja u radu analizira uticaj germanskih pravnih sistema na regulativu instituta ugovora o poklonu u zakonodavstvu Bosne i Hercegovine. Uticaj germanskih pravnih sistema (austrijsko, njemačko, švicarsko zakonodavstvo) na pozitivno pravo u Bosni i Hercegovini izuzetno je veliki, te su pitanja koja se tiču analize takvih uticaja, u smislu njihovog porijekla, adekvatnosti i nužnosti njihovog reformiranja konstantno aktualna. Kandidatkinja je o tematici pod gornjim naslovom govorila u okviru konferencije koju je pod nazivom "2nd Zagreb International Conference on the Law on Obligations" organizirao Ekonomski fakultet Sveučilišta u Mostaru 28-30.09.2022. godine, te je rad istoimenog naslova nastao kao rezultat istraživanja poduzetog u cilju sudjelovanja na navedenoj konferenciji.

Činjenica je da je pri usvajanju Zakona o obligacionim odnosima (dalje: ZOO) 1978. godine donesena odluka da istim ne bude reguliran ugovor o poklonu, nego da bivše

jugoslovenske republike ovu problematiku urede na republičkom nivou. U Bosni i Hercegovini to nije učinjeno, a kako nakon disolucije bivše Jugoslavije u BiH nije izvršena reforma ZOO, koji se primjenjuje kao entitetski propis (ZOO FBiH i ZOO RS), sudovi se prilikom rješavanja sporova iz osnova ugovora o poklonu susreću s nužnošću primjene rješenja austrijskog Općeg građanskog zakonika (OGZ), koja na domaćim prostorima imaju karakter pravnih pravila i koja su kad je riječ o ugovoru o poklonu dijelom modificirana kroz sudsku praksu. U radu se, u smislu odabranih pitanja, tematizira 1) pitanje forme ugovora o poklonu, te 2) pitanje opoziva ugovora o poklonu usljed nezahvalnosti poklonoprimca. Pitanje forme ugovora o poklonu pokretnih stvari i osobito pitanje forme ugovora o poklonu nekretnina trenutno je izuzetno značajno u Federaciji Bosne i Hercegovine u svjetlu recentnih odluka Ustavnog suda FBiH o neustavnosti pojedinih odredbi federalnog Zakona o notarima i određenih drugih zakona. Pitanje opoziva poklona usljed nezahvalnosti poklonoprimca nameće se kao izuzetno značajno u kontekstu činjenice da je u sudskoj praksi sudova na prostorima bivše Jugoslavije, pa tako i u BiH, dijelom odstupano od pravila OGZ-a prema kojem se u nezahvalnosti poklonoprimca, a u cilju opoziva, moraju ostvariti obilježja bića određenog krivičnog djela.

U radu su analizirane aktualne teme koje predstavljaju izazov za pravnu nauku i zakonodavca; u tom smislu Komisija rad karakterizira kao inspirativan i značajan prije svega u smislu *de lege ferenda* regulative.

- 2) **”Umjetna inteligencija i rizici za potrošača: Odgovornost za zavaravajuće informiranje od strane chatbotova”**, koautorstvo s prof. dr. Anitom Petrović, rad prihvaćen za objavljivanje u časopisu ”Zbornik radova Pravnog fakulteta u Tuzli”, s potvrdom da će datum izdavanja biti u 2025. godini.

Kandidatkinja u koautorstvu s prof. dr. Anitom Petrović u radu analizira problematiku upotrebe od strane trgovaca na njihovim internetskim stranicama automatiziranih softvera (botova) u zaključivanju ugovora s potrošačima, a u smislu propusta koji tokom takve komunikacije bivaju učinjeni od strane AI sistema. Riječ je o praksi koja je sve učestalija i koja za sobom povlači niz pitanja na koja je nužno što prije odgovoriti, poput pitanja ko

i po kojem osnovu odgovara potrošaču za štetu koju je potrošač pretrpio usljed činjenice da ga je automatizirani sistem pogrešno informirao o činjenicama odlučnim za donošenje odluke o zaključenju ugovora.

U tom je smislu analizirana presuda kanadskog suda iz 2024. godine u slučaju *Moffat v. Air Canada* u kontekstu pogrešnog informiranja potrošača kao korisnika usluga avioprijevoznika Air Canada, te se nastojalo dati odgovor na pitanje kako bi slučaj pogrešnog informiranja bosanskohercegovačkog potrošača od strane chatbota i njegovo uzročno oštećenje trebalo tretirati u domaćem zakonodavstvu.

Rad je od strane recenzenata ocijenjen kao izvorni naučni rad, imajući u vidu činjenicu da se u istom analizira izuzetno recentnu, aktualnu sudsku praksu, te iznosi nove i neobjavljene rezultate originalnog istraživanja, koji mogu biti izuzetno korisni u suočavanju domaćeg zakonodvca s izazovima predstojećeg nužnog normiranja problematike istražene u ovom radu.

- 3) **”Reforma Zakona o obligacionim odnosima u Bosni i Hercegovini s posebnim osvrtom na zaštitu potrošača”**, Godišnjak Pravnog fakulteta u Sarajevu, LXVII – 2024., str. 47-82

U ovom se radu Kandidatkinja bavi pitanjima nužnosti reforme Zakona o obligacionim odnosima u Bosni i Hercegovini u kontekstu specifičnog problema eventualnog integriranja u ZOO određenih rješenja kojima se obezbjeđuje zaštitu potrošača. Riječ je o problematici kojoj u domaćoj nauci obligacionog prava pripada izuzetan značaj, prije svega imajući u vidu činjenicu da je reforma ZOO u određenoj mjeri neophodna odnosno da je njeno poduzimanje u predstojećem periodu, osobito na putu ispunjavanja uslova za pridruživanje EU, neizbježno, kao i imajući u vidu to da je pri takvoj reformi opravdano razmišljati o tome da li i koja pitanja zaštite potrošača u BiH urediti u okviru reformiranog ZOO.

U tom se kontekstu Kandidatkinja posvećuje pitanjima zaštite potrošača od nepoštenih općih uslova poslovanja, te problematici odgovornosti trgovca potrošaču za materijalne nedostatke predmeta ugovora o potrošačkoj prodaji, analizirajući koristi i štete od uključenje u ZOO rješenja kojima se u pogledu ova dva pitanja osigurava zaštitu domaćim potrošačima.

Rad je ocijenjen kao izvorni naučni rad, imajući u vidu u njemu iznesene zaključke i *de lege ferenda* prijedloge koji mogu biti izuzetno korisni u predstojećoj reformi ZOO.

4) **"Issues related to implementaion of the Directive (EU) 2019/771 in the legislation of Bosnia and Herzegovina", SEE Law Journal, Issue 13, December 2024, str. 45-61**

U radu se problematizira nužnost usklađivanja domaćeg zakonodavstva s rješenjima Direktive (EU) 2019/771 Evropskog parlamenta i Vijeća od 20. maja 2019. godine o određenim aspektima ugovora o kupoprodaji, izmjeni Uredbe (EU) 2017/2394 i Direktive 2009/22/EZ, te stavljanju van snage Direktive 1999/44/EZ. Riječ je o instrumentu harmonizacije kojim je, zajedno s Direktivom (EU) 2019/770, reformirana evropska regulativa odgovornosti za usklađenost robe s ugovorima o potrošačkoj prodaji i koji se u EU primjenjuje od 01.01.2022. godine.

Kandidatkinja u prvom dijelu rada skreće pažnju na novosti koje u odnosu na prethodnu regulativu donosi Direktiva (EU) 2019/771, da bi u njegovom drugom dijelu problematizirala transpoziciju rješenja ove direktive u domaće zakonodavstvo. Transpozicija EU rješenja predstavlja ovdje zahtjevnu zadaću, ima li se u vidu činjenicu da se direktivom uređuje pitanja koja zadiru u samu srž ugovornog prava, te odatle opet pitanje da li rješenja kojima se vrši transpoziciju integrirati u ZOO ili učiniti dijelom zasebnog, sistemskog zakona u oblasti zaštite potrošača.

U navedenom je smislu rad dio istraživanja kojim se kandidatkinja ozbiljno bavi već duži period u smislu pronalaženja odgovora na pitanje kako domaće zakonodavstvo usklađivati s onim potrošačkim normativima koji se tiču osnovnih instituta ugovornog prava, te shodno tome rad može biti okarakteriziran kao izuzetno značajan u smislu njegovog doprinosa

predstojećoj reformi ZOO i tekućim procesima usklađivanja domaćeg zakonodavstva s potrošačkim *aquisom*.

- 5) **"Hijerarhija prava potrošača kao kupca stvari s materijalnim nedostatkom: prijedlozi de lege ferenda"**, Godišnjak Pravnog fakulteta Univerziteta u Banjoj Luci, broj 46, 2024, str. 27-53

U pravu BiH odgovornost za materijalne nedostatke jedna je od osnovnih ugovornih obaveza prodavca, regulirana entitetskim zakonima o obligacionim odnosima, koji nakon njihovog preuzimanja u pravni sistem Bosne i Hercegovine u ovom dijelu nisu trpili nikakve izmjene ni dopune. U tom smislu Kandidatkinja u ovom radu problematizira pitanje nužnosti usklađivanja domaćih rješenja s evropskim normativima odgovornosti za nedostatke na predmetu ugovora o potrošačkoj prodaji, ukazujući u prvom dijelu rada na hijerarhiju prava kupca postojeću u domaćem zakonodavstvu, da bi potom analizirala novosti koje Direktiva (EU) 2019/771 donosi kao je riječ o hijerarhijskog organizaciji prava potrošača kao kupca stvari s materijalnim nedostatkom i dala prijedloge za njihovu adekvatnu transpoziciju u zakonodavstvo Bosne i Hercegovine.

Rad je od strane recenzenata okarakteriziran kao pregledni naučni rad u smislu da sadrži kritički i sažet prikaz jednog dijela domaćeg normativnog okvira s prijedlozima za njegovo nužno predstojeće usklađivanje s evropskim normativnim okvirom.

- 6) **"Šta donosi novi prijedlog Direktive Evropskog parlamenta i Vijeća o odgovornosti za neispravne proizvode i šta to znači za Bosnu i Hercegovinu?"**, Zbornik radova sa Međunarodnog naučnog skupa "Izazovi i perspektive razvoja pravnih sistema u XXI vijeku", 3/23, str. 247-267

Rad je nastao kao naučna analiza Prijedloga Direktive Evropskog parlamenta i Vijeća o odgovornosti za neispravne proizvode i stavljanju van snage Direktive 85/374/EEZ kao prijedloga iz septembra 2022. godine, kojim se nastojalo reformirati gotovo četiri decenije staru evropsku regulativu proizvođačeve objektivne odgovornost za neispravne proizvode i napraviti njen svojevrsan *update* s tekućim procesima zelene i digitalne tranzicije.

U radu Kandidatkinja u njegovom prvom dijelu komparira rješenja Direktive 85/374/EEZ, analizirajući predložena nova rješenja i ocjenjujući ih kao pohvalan prvi korak u revidiranju normativnog okvira ove značajne oblasti, uz naglašavanje nužnosti daljeg pojašnjavanja i preciziranja određenih rješenja. U drugom dijelu analiziran je domaći normativni okvir kojim se uređuje pitanje odgovornosti proizvođača za štetu od njegovog neispravnog proizvoda. Isti je u aktualnom trenutku ocijenjen kao isuviše uopćen i neprecizan, te je naglašena nužnost njegovog skorog usklađivanja s evropskim standardima zaštite potrošača od neispravnih proizvoda. Svakako treba imati u vidu to da je ovaj rad objavljen prije usvajanja Direktive (EU) 2024/2853 iz oktobra 2024. godine, pri usvajanju teksta koje je svakako u obzir uzet Prijedlog iz septembra 2022. godine.

Rad su recenzenti kategorizirali kao izvorni naučni rad, svakako imajući u vidu gorući značaj koji je problem reforme oblasti odgovornosti proizvođača za neispravne proizvode imao u evropskim okvirima u trenutku kad je rad recenziran i objavljen, no također cijeneći i značaj koji rezultati prezentirane analize imaju za usklađivanje domaćeg s evropskim normativnim okvirom.

- 7) **”O nekim aspektima zaštite osiguranika kao potrošača u ugovoru o kasko osiguranju motornog vozila”**, Godišnjak Pravnog fakulteta u Sarajevu, LXVI – 2023., str. 249-284, koautorstvo s dr. Vesnom Lazić Buljan

U koautorstvu s dr. Lazić Buljan Kandidatkinja je objavila rad u kojem se analizira pravni okvir i sudsku praksu u kontekstu zaštite osiguranika kao potrošača u ugovorima o kasko osiguranju motornih vozila, pri čemu je naglasak stavljen na zaštitu osiguranika od nepoštenih odredbi općih uslova osiguranja, a imajući u vidu činjenicu nejednakih pregovaračkih pozicija postojećih između osiguranika kao potrošača s jedne i osiguravatelja s druge strane.

U radu su analizirane pojedine odredbe pravila za kasko osiguranje motornih vozila u smislu, konkretno, pokušaja davanja odgovora na pitanje može li nemogućnost ispunjenja određene obaveze osiguranika voditi isključenju osiguravateljeve obaveze na naknadu štete.

Rad je kategoriziran kao pregledni naučni rad; njegova se aktualnost posebno ogleda u činjenici da je jedan od rijetkih radova koji su u Bosni i Hercegovini posvećeni tematici od izuzetnog praktičnog značaja, a aktualnim se smatra i imajući u vidu sve naglašeniju potrebu posmatranja osiguranika fizičke osobe kao potrošača, radi čije je adekvatne zaštite neophodno normativno usklađivanje s potrošačim *aquisom* i u ovoj važnoj oblasti.

- 8) **"Odgovornost za štetu od vakcina u zakonodavstvu Bosne i Hercegovine"**, Pravni i društveni aspekti vakcinacije tokom pandemije kovida 19, Institut za uporedno pravo, Beograd, 2022., str. 185-200

U ovom radu analizi je podvrgnut pravni okvir obeštećenja osoba vakcinisanih u Bosni i Hercegovini, postojeći u trenutku proglašenja pandemije Covid – 19, te tokom njenog trajanja. Cilj kojim se Kandidatkinja u istraživanju vodila vezan jeste dokazivanje neadekvatnosti postojećih rješenja da odgovore na odštetne zahtjeve oštećenih koji su vakcinisani različitim vakcinama, uključujući tu i vakcinu protiv bolesti Covid – 19, kao u tom trenutku isključivo preporučenom vakcinom.

Vodeći računa o tome da BiH jeste zemlja u kojoj je, uprkos nametnutoj obavezi vakcinacije nizom vakcina, obeštećenje oštećenih vakcinisanih moguće samo u okviru građanskopravne odgovornosti za štetu, Kandidatkinja je analizirala pravni okvir postojeći u entitetskim zakonima o obligacionim odnosima. Kao rezultat takve analize nametnuo se zaključak shodno kome je, očekivano, obeštećenje u parnici koja započinje tužbom oštećene vakcinisane osobe dugotrajan, skup i u pogledu ishoda neizvjestan proces, te se nastavno na to u radu dalje promišlja o alternativama koje su postojeće u uporednom pravu.

Istraživanje koje je Kandidatkinja pri pisanju ovog rada poduzela od izuzetnog je značaja za sagledavanje stanja normativnog okvira koji se koristi pri rješavanju sporova koje mogu pokrenuti i pokreću osobe koje su usljed vakcinacije pretrpile određenu štetu, a sa ciljem prepoznavanja problema i davanja odgovora na pitanje kako adekvatno normativno urediti oblast koja ima potencijal da iz nje u narednom periodu proizađe izuzetno velik broj kompliciranih sporova.

- 9) **"Obaveza ispunjenja ugovora u uslovima pandemije virusom SARS – COV – 2",**
Zbornik radova Aktualnosti građanskog i trgovačkog zakonodavstva i pravne prakse, br.
19, Mostar 2022., str. 252-269

U ovom radu analizira se posljedice pandemije virusom SARS – COV – 2 na ispunjenje ugovornih obaveza, u smislu pokušaja davanja odgovora na pitanje ko snosi štetne (negativne) posljedice nemogućnosti odnosno značajnog otežanja izvršenja ugovornih obaveza koje proizlaze iz ugovora u kojima ugovorne strane nisu anticipirale moguće pandemije različitih bolesti.

U tom smislu analizirani su institut više sile i institut promijenjenih okolnosti, kao klasični instituti obligacionog prava regulirani i u domaćem zakonodavstvu, uz izvođenje zaključaka o mogućnosti njihove primjene u okolnostima kakve su karakterizirale poslovanje u periodu pandemije Covid – 19.

Zaključno se ističe kako nastojanje uopćavanja odgovora na pitanje predstavljaju li posljedice pandemije Covid – 19 višu silu ili promijenjene okolnosti nije moguće. Uopćavanja su kad je riječ o institutu više sile kompliciranija u nacionalnim u odnosu na međunarodne okvire, imajući u vidu činjenicu da je doktrina više sile u međunarodnom pravu u međuvremenu stekla karakter općeg načela. S druge strane, uopćavanje je kad je riječ o promijenjenim okolnostima teže u međunarodnim okvirima, s obzirom na to da klauzula *rebus sic stantibus* nije integralni dio novog trgovinskog prava na način na koji je to slučaj s višom silom.

Značaj rada, koji je okarakteriziran kao pregledni naučni rad, Komisija vidi u tome da on, u trenutku u kojem je nastao, kao i u narednom periodu koji će izvjesno obilovati sporovima nastalim zbog neizvršavanja obaveza usljed pandemije Covid - 19, jeste i ostaje aktualno i izuzetno korisno štivo; u radu obrađena tematika kod nas je bila nepravedno zapostavljena, pa radije činjenica da joj je posvećena kvalitetna naučna analiza.

- 10) **"Direktiva 85/374/EEZ o odgovornosti za proizvode: je li vrijeme za reformu?",**
Godišnjak Pravnog fakulteta u Sarajevu, LXIV – 2021., str. 137-164

U skladu s naslovom rada, u njemu je analizirana nužnost reforme Direktive 85/374/EEZ kao evropskog harmonizacijskog instrumenta kojim je ustanovljena objektivna odgovornost proizvođača za štetu od neispravnih proizvoda. U radu je najprije kritički analizirana regulativa koju direktiva sadrži, uz naglašavanje potrebe njenog usklađivanja s promjenama na unutrašnjem tržištu, da bi potom analizirano bilo i stanje domaćeg zakonodavstva, koje nikada nije usklađeno s njenim rješenjima.

Rad je u trenutku kada je recenziran kategoriziran kao izvorni naučni rad, s obzirom na to da se autorica u njemu bavi analizom u tom trenutku izuzetno aktualne i značajne teme kroz kritički i originalan pristup, posebno u dijelu koji se tiče domaćeg normativnog okvira i potrebe njegovog aktualiziranja u cilju adekvatne zaštite potrošača.

5.3. Objavljene knjige

Kandidatkinja je dostavila **dvije (2)** objavljene knjige/univerzitetska udžbenika koji su predmetom ocjene od strane Komisije.

- 1. Odštetno pravo, Univerzitet u Sarajevu – Pravni fakultet, Sarajevo, 2025.,** ISBN 978-9926-544-11-9, CIP zapis dostupan u COBISS sistemu Nacionalne i univerzitetske biblioteke BiH pod brojem ID 65130502

Knjigu „Odštetno pravo“ primarno je pisana s namjerom da istu studenti prava u Bosni i Hercegovini koriste kao osnovnu udžbeničku literaturu za izučavanje materije odštetnog prava/prava naknade štete, te su u skladu s tom namjerom kreirani sistematika izlaganja i korišteni metodološki pristup. U tom smislu sistematika udžbenika je pregledna, a udžbenik pisan jednostavnim i jasnim jezikom. Istovremeno, kandidatkinja je izlaganje temeljeno na pozitivnopravnim rješenjima nastojala učiniti atraktivnim i teoretičarima i praktičarima koji se bave odštetnim pravom na način da je u izlaganje uključila sudsku praksu koja je nastajala tokom više od četiri decenije primjene Zakona o obligacionim odnosima i teorijska razmatranja o pitanjima povodom kojih su na prostorima bivše Jugoslavije nastali podijeljeni stavovi teoretičara

i praktičara (protivpravnost kao uslov odgovornosti, shvatanje krivice itd.), uz, konačno, naglašavanje nužnosti usvajanja određenih novih rješenja kojima se prati savremene tokove razvoja nauke obligacionog i time i odštetnog prava.

Obim udžbenika iznosi 228 strana formata B5, uz 101 izvor literature i 522 fusnote. Tekst je podijeljen u devet poglavlja, kojima se prati tradicionalnu i na sistematiku Zakona o obligacionim odnosima naslonjenu strukturu materije vanugovorne i ugovorne odgovornosti za štetu.

Prvim poglavljem, koje nosi naslov „Građanskopravna odgovornost za štetu“ obuhvaćena je materija kojom se čitaoca općenito uvodi u problematiku građanskopravne odgovornosti za štetu, da bi nakon toga uslijedio historijski presjek razvoja odštetnog prava u Bosni i Hercegovini, te materija koja se odnosi na preveniranje nastanka štete u smislu zahtjeva da se ukloni opasnost štete i zahtjeva da se prestane s povredom prava ličnosti. U poglavlju 2 - „Pojam i uslovi odgovornosti za štetu“ – u skladu s naslovom razmatra se pojam odgovornosti za štetu, te uslovi odgovornosti (subjekti odgovornosti, štetna radnja, protivpravnost, šteta, uzročna veza između štetne radnje i posljedice). Treće poglavlje, koje nosi naslov „Vrste odgovornosti“ posvećeno je podjeli odgovornosti u skladu sa sistematikom koju se pronalazi u ZOO, a to je podjela na subjektivnu i objektivnu odgovornost, odgovornost za drugog i odgovornost po osnovu pravičnosti, uz, završno, analizu posebnih slučajeva odgovornosti (odgovornost usljed terorističkih akata, javnih demonstracija ili manifestacija, odgovornost organizatora priredbi, odgovornost zbog uskraćivanja nužne pomoći, odgovornost u vezi s obavezom zaključenja ugovora i odgovornost u vezi s obavljanjem poslova od javnog interesa). U okviru poglavlja 4, koje nosi naslov „Posebni slučajevi odgovornosti“ obrađena je materija posebnih slučajeva objektivne odgovornosti, u smislu odgovornosti u slučaju nezgode izazvane motornim vozilom u pokretu i odgovornosti proizvođača za štetu s nedostatkom. U dijelu koji se tiče odgovornosti proizvođača stvari s nedostatkom, nakon dijela koji se tiče domaćeg zakonodavstva, analizirana je i evropska regulativa odgovornosti proizvođača za štetu od neispravnog proizvoda u skladu s najaktualnijim EU normativnim okvirom u ovoj oblasti, Direktivom (EU) 2024/2853, koja je u EU na snagu stupila 9. decembra 2024. godine. U petom poglavlju, koje se tiče odgovornosti više osoba za istu štetu, sadržana je analiza rješenja koja se tiču odgovornosti više osoba za štetu koju su prouzrokovale zajedno, kao i nezavisno jedna od druge, te analiza rješenja kojima je uređena odgovornost više osoba za istu štetu u slučaju nerazjašnjenog prouzrokovanja, solidarna odgovornost naručioca i izvođača radova

i pitanje regresa isplatioca. U poglavlju šest, pod naslovom „Naknada štete“, sadržana su uopćena razmatranja o naknadi štete, te izlaganje koje se tiče naknade materijalne štete, dok je poglavlje sedam posvećeno naknadi štete u obliku rente. Poglavljem osam obuhvaćena je izuzetno značajna materija naknade neimovinske štete. Uz analizu trenutno postojećih rješenja, u ovom je dijelu udžbenika ukazano na nužne pravce reforme rješenja ZOO koja se tiču naknade neimovinske štete. U posljednjem, devetom poglavlju, koje se tiče ugovorne odgovornosti, pronalazi se izlaganja koja se odnose na pojmovno određenje ugovorne odgovornosti, njene pretpostavke, oslobađanje dužnika od odgovornosti, obim odgovornosti i njeno modificiranje, kao i analiza trenutno aktualne problematike ugovorne odgovornosti za neimovinsku štetu.

Tematika obrađena u ovom udžbeniku vrlo je kompleksna, te je jedna od osnovnih intencija Kandidatkinje kao autorice bila da istu izloži na iscrpan odnosno potpun i studentima razumljiv način. Kako bi različiti instituti odštetnog prava studentima bilo lakše shvatljivi u izlaganje je uključen veliki broj primjera i stavova iz sudske prakse sudova s prostora bivše Jugoslavije (primarno Slovenija, Hrvatska, Srbija). Osim toga, skrenulo se pažnju na činjenicu da je pri reformi Zakona o obligacionim odnosima u državama u okruženju došlo do usvajanja određenih drugačijih rješenja, koja su dijelom rezultat drugačijeg teorijskog pristupa, a dijelom inspirirana modernim tokovima u razvoju obligacionog prava.

Knjiga „Odštetno pravo“ Kandidatkinje dr. Almedine Šabić Učanbarlić predstavlja originalno naučno djelo, u kojem je obrađena materija odštetnog prava u cjelini, u kojem je smislu preporučena kao univerzitetski udžbenik za studente prvog, drugog i trećeg ciklusa studija prava, a korisna je i za praktičare u pravosuđu, advokaturi i sl.

2. Metodologija rješavanja slučaja u obligacionom pravu, Univerzitet u Sarajevu – Pravni fakultet, Sarajevo, 2025. (u koautorstvu s Abedinom Bikićem i Enesom Bikićem)
CIP zapis dostupan u COBISS sistemu Nacionalne i univerzitetske biblioteke BiH pod brojem ID 65175814

Knjiga „Metodologija rješavanja slučaja u obligacionom pravu“ univerzitetski je udžbenik koji studentima prava u Bosni i Hercegovini treba olakšati razumijevanje i savladavanje kompleksne

materije obligacionog prava kroz korištenje metodologije rješavanja različitih praktičnih pravnih problema koji se mogu pojaviti odnosno pojavljuju u ovoj oblasti. U tom je smislu u ovaj udžbenik, koji je pisan jasnim, studentima razumljivim jezikom, integriran određeni broj praktičnih pravnih problema kojima se prati materiju koju se studentima predaje u okviru predmeta obligaciono pravo. Riječ je o izuzetno korisnom alatu koji studentima olakšava razumijevanje velikog broja složenih instituta obligacionog prava, čineći im tako jednostavnijim i spremanje i polaganje samog ispita.

Obim udžbenika iznosi 112 strana formata B5, uz podjelu na uvod i tri poglavlja.

U uvodnom dijelu udžbenika naglašen je izuzetan značaj koji pri savladavanju obimne i kompleksne materije obligacionog prava pripada rješavanju praktičnih pravnih problema, uz istovremeno ukazivanje na činjenicu izuzetne korisnosti metodologije ispitivanja prema osnovima zahtjeva, koja svoje porijeklo vodi iz njemačkog prava, no uopćeno je i itekako primjenjiva i kod nas pri rješavanju različitih sporova u oblasti građanskog prava. Čitaocu se u uvodnom dijelu skreće pažnju i na karakteristike koje jedno činjenično stanje pretvaraju u slučaj, kao i na pretpostavke za uspješno rješavanje slučajeva u oblasti obligacionog prava. U prvom dijelu udžbenika, koji nosi naslov „Koraci u rješavanju obligacionog slučaja“ objašnjava se pojedine korake u procesu rješavanja slučaja, počevši od čitanja činjeničnog stanja i njegovog skiciranja, preko prepoznavanja zahtjeva i pronalaženja osnova tih zahtjeva, do supsumcije činjenica pod pravnu normu i pisanja ekspertize odnosno stručnog pravnog mišljenja. U drugom dijelu predstavljena su 23 slučaja iz različitih oblasti obligacionog prava zajedno sa objašnjenjima njihovih rješenja. Konačno, u trećem dijelu udžbenika predstavljeno je 50 neriješenih praktičnih pravnih problema, koji studentima služe za uvežbavanje rješavanja slučajeva iz obligacionog prava.

Udžbenik „Metodologija rješavanja slučaja u obligacionom pravu“ ima karakter originalnog naučnog djela, te je preporučen kao univerzitetski udžbenik kojeg će primarno koristiti studenti prvog ciklusa studija prava.

6. Originalni stručni uspjeh kao što je projekt, patent ili originalni metod

6.1. Učešće u projektu BizUp program podrške poduzetnicama u Bosni i Hercegovini

Kandidatkinja je dostavila dokaz: Potvrda izdata od strane izvršne direktorice F787 – Fondacije za društveno-ekonomski razvoj 787 da je bila učesnica u projektu BizUp podrške poduzetnicama u Bosni i Hercegovini

Projekat BizUp program podrške poduzetnicama u Bosni i Hercegovini započeo je krajem 2020. godine i realiziran je u organizaciji Fondacije 787, a sufinansiran je od strane Britanske ambasade u Sarajevu i organizacije UN Women. U okviru ovog projekta podržan je rad poduzetnica iz raznih dijelova Bosne i Hercegovine kroz pružanje bespovratnih sredstava i stručne podrške u vidu niza poslovnih edukacija.

U svojstvu stručne predavačice Kandidatkinja je učestvovala u edukaciji pod naslovom "Zaštita potrošača: Mali vodič za poduzetnice u Bosni i Hercegovini", u okviru kojeg je fokus stavljen na normativni okvir zaštite potrošača i tematiku koja je u tom dijelu relevantna za poduzetnice u Bosni i Hercegovini (isticanje cijena, rasprodaja, oglašavanje, odgovornost za proizvod/uslugu).

6.2. Organizacija okruglog stola "45 godina Zakona o obligacionim odnosima u Bosni i Hercegovini: stanje i reformske perspektive"

Kandidatkinja je dostavila dokaze: Prijavni obrazac za sufinansiranje organiziranja konferencija/događaja na području Kantona Sarajevo u 2023. godini od 08.06.2023. godine; Preliminarnu listu po Javnom pozivu za sufinansiranje naučnoistraživačkih/umjetničkoistraživačkih i istraživačkorazvojnih projekata i programa iz Budžeta Kantona Sarajevo za 2023. godinu, broj: 27-02-35-18976-6/23 od 14.07.2023. godine; Prijedlog za imenovanje, izmjenu/dopunu projektnog tima, br: 01-1899/23 od 02.11.2023. godine; Zahtjev za isplatu sredstava iz projekta, br: 01-1899-1/23 od 02.11.2023. godine i Izvještaj o realizaciji projektnih aktivnosti od 04.01.2024. godine

Kandidatkinja je kao voditeljica projekta organizacije događaja "Okrugli stol: 45 godina Zakona o obligacionim odnosima u Bosni i Hercegovini: stanje i reformske perspektive", zajedno sa članovima Organizacionog odbora prof. dr. Zinkom Grbo, dekanicom Pravnog fakulteta Univerziteta u Sarajevu, prof. dr. Abedinom Bikićem, redovnim profesorom Pravnog fakulteta u Sarajevu i dr. Vesnom Lazić Buljan, u tom trenutku sekretarom Pravnog fakulteta u Sarajevu, kreirala projektnu ideju i prijavu na Javni poziv za sufinansiranje naučnoistraživačkih/umjetničkoistraživačkih i istraživačkorazvojnih projekata i programa iz Budžeta Kantona Sarajevo za 2023. godinu.

Okrugli stol navedenog naziva organiziran je u cilju problematiziranja neophodne reforme Zakona o obligacionim odnosima u Bosni i Hercegovini, a u povodu 45 godina njegovog važenja u BiH, kroz susret i naučno-stručnu diskusiju profesora obligacionog prava s javnih pravnih fakulteta u BiH i stručnjaka iz prakse. Projektni prijedlog je usvojen, što je publicirano objavljivanjem Preliminarne liste u julu 2023. godine. Događaj je održan 28.09.2023. godine na Pravnom fakultetu u Sarajevu i istom su prisustvovali nastavnici koji na javnim pravnim fakultetima u BiH predaju predmete u okviru kojih se problematizira pitanja regulirana Zakonom o obligacionim odnosima. U auditoriju su sjedili i u diskusiji sudjelovali stručnjaci iz prakse, te studenti sva tri ciklusa studija prava na pravnim fakultetima u BiH. Događaj je ocijenjen izuzetno pozitivno i rezultirao je usvajanjem zaključaka o pravcima reforme Zakona o obligacionim odnosima u BiH. Zaključci su obuhvaćeni u radu Kandidatkinje, koji je pod naslovom "Reforma Zakona o obligacionim odnosima u Bosni i Hercegovini s posebnim osvrtom na zaštitu potrošača" publiciran u Godišnjaku Pravnog fakulteta u Sarajevu, LXVII 2024 (str. 47-82).

6.3. Učešće u Radnoj grupi za izradu Prednacrt Zakona o zaštiti potrošača

Kandidatkinja je u septembru 2024. godine imenovana u Radnu grupu za izradu Prednacrt Zakona o zaštiti potrošača, što je potkrijepila dostavljanjem Rješenja o dopunama Rješenja o imenovanju radne grupe za izradu Prednacrt Zakona o zaštiti potrošača broj: 01-30-1083-1723 od 16.09.2024. godine.

7. Uspješno mentorstvo najmanje po jednog kandidata za stepen drugog odnosno integriranog ciklusa studija i trećeg ciklusa studija

Kandidatkinja je dostavila potvrdu koju je izdao Univerzitet u Sarajevu – Pravni fakultet, br: 01-672-1/25 od 23.06.2025. godine da je uspješno ostvarila sedam (7) mentorstava na II ciklusu studija u vremenu od decembra 2019. do maja 2025. godine (Adna Avdić: "Vrste sticanja bez osnova"; Merima Imamović: "Zaštita potrošača u ugovorima o potrošačkom kreditu"; Irfan Osmanović: "Posebna prava potrošača u okviru ugovora o potrošačkom kreditu"; Jasmina Vugdalić: "Zaštita potrošača u bankarskim kreditnim poslovima u pravu Bosne i Hercegovine u odnosu na pravo EU", Emma Omerhodžić: "Zaštita potrošača u ugovorima na daljinu, s posebnim osvrtom na utjecaj pandemije bolesti Covid – 19"; Amina Masleša: "Alterativno rješavanje potrošačkih sporova" i Nejla Baždar: "Medijacija potrošačkih sporova").

U pogledu uslova koji se tiče mentorstva na III ciklusu studija, kandidatkinja je dostavila potvrdu koju je izdao Univerzitet u Sarajevu – Pravni fakultet, br: 01-673-1/25 od 23.06.20205. godine da je Odlukom Senata Univerziteta u Sarajevu broj: 01-2-99/23 od 25.01.2023. godine imenovana za mentoricu pri izradi doktorske disertacije pod naslovom "Zaštita potrošača i moderni ugovori s posebnim osvrtom na zakonodavstvo Bosne i Hercegovine" doktoranta mr. sci. Emira Salihovića. Mentorstvo je uspješno okončano odbranom doktorske disertacije dana 17.04.2025. godine.

Odlukom Senata Univerziteta u Sarajevu broj: 01-8-71/21 od 26.05.2021. godine kandidatkinja je imenovana za mentoricu pri izradi doktorske disertacije pod naslovom "Naknada štete uzrokovane povredom prava na jednako postupanje – s posebnim osvrtom na djelatnost obrazovanja" doktoranta mr. sci. Asima Bojića. Izrada doktorske disertacije je u toku.

8. Nastavničke sposobnosti, doprinos procesu internacionalizacije i društveni doprinos

U smislu dokazivanja **nastavničkih sposobnosti** kandidatkinja u skladu sa Smjernicama i kriterijima za način vrednovanja uslova za izbore u akademska zvanja iz čl. 227 st. 2 Statuta podnosi dokaze:

- rezultate anketa, preuzete sa <http://www.eunsa.ba/ankete> (printana forma), te izvještaje o provedenoj evaluaciji za akademske godine 20/21, 21/22, 22/23 i 23/24, dostupne na: <http://www.pfsa.unsa.ba/pf/odbor-za-kvalitet>;
- podatke o nastavnom opterećenju nastavnice prema tabeli "Podaci o nastavnom opterećenju nastavnika" za akademsku 2024/2025;
- podatke o mentorstvima na II i III ciklusu studija, te članstvima u komisijama za završne radove i članstvima u komisijama za ocjenu i odbranu doktorskih disertacija i to:
 - a) mentorstva pri izradi i odbrani završnih radova – sedam (7)) – Potvrda Univerziteta u Sarajevu – Pravnog fakulteta broj: 01-672-1/25 od 23.06.2025. godine i uspješno mentorstvo na III ciklusu – jedno (1)) – Potvrda Univerziteta u Sarajevu – Pravnog fakulteta broj: 01-673-1/25 od 23.06.2025. godine;
 - b) članstva u preko petnaest (15) komisija za završne radove na smjerovima Katedre građanskog prava, te imenovanja u svojstvu predsjednice komisije i članice komisije za ocjenu i odbranu već odbranih doktorskih disertacija (četiri (4): Darko Soldat; Vesna Lazić; Nasir Muftić; Almir Jašarević) i imenovanje u svojstvu predsjednice i članice komisije za odbranu doktorske disertacije doktorantu Saninu Pačarizu, sve provjerljivo u Službi postdiplomskog studija Fakulteta (II i III ciklus);

Kandidatkinja prilaže dokaz o tome da je u svojstvu edukatorice tokom 2024. i 2025. godine održala predavanja u okviru priprema za polaganje pravosudnog ispita na nivou Bosne i Hercegovine (dokaz: Potvrda izdata od strane KEC grupe sp Banja Luka od 17.06.2025. godine), kao i da je kao edukatorica pri Refam Creative Solutions – REC d.o.o. – tokom 2024. i 2025. godine održala predavanja na teme: "Bankarska garancija" i "Docnja" (maj 2024. godine) i "Modificiranje ugovorne odgovornosti" i "Zastarjelost" (april 2025. godine) (dokaz: Potvrda izdata od strane REC d.o.o. od 02.06.2025. godine).

U smislu dokazivanja **doprinosa procesu internacionalizacije** kandidatkinja podnosi dokaze za 1) učešće u radu prestižnih međunarodnih konferencija (npr. 2nd Zagreb International Conference on the Law on Obligations 28-30.09.2022. godine – dokaz: Program održane konferencije i e-mail korespondencija s organizatorom); 2) učešće u recenziranju međunarodnih projekata ili međunarodnih naučnih radova ili knjiga/monografija izdatih na stranim jezicima (npr. recenzija rada pod naslovom "Opći uvjeti poslovanja u digitalnom dobu", objavljenog u knjizi

”Modernizacija Zakona o obveznim odnosima: Rasprave o potrebi reforme obveznog prava” (e-izdanje dostupno na: https://www.researchgate.net/publication/383913515_Modernizacija_Zakona_o_obveznim_odnosima_Rasprave_o_potrebi_reforme_obveznog_prava ; 3) imenovanje za nacionalnog izvjestioca na temu ”Ugovorna pravičnost: ponovno rađanje ideje (national reporter on the topic ”Contractual Fairness: The Rebirth of an Idea/La justice contractuelle: la renaissance d'une idee) na godišnjoj konferenciji Međunarodne akademije uporednog prava (International Academy of Comparative Law) u Berlinu 2026. godine – Komisiji poznata činjenica; dokaz: e-mail korepodscncija).

U smislu **društvenog doprinosa** kandidatkinja podnosi dokaze o organizaciji naučnog skupa – Okruglog stola pod naslovom ”45 godina Zakona o obligacionim odnosima u Bosni i Hercegovini: stanje i reformske perspektive” u svojstvu voditeljice projekta finansiranog iz budžeta Kantona Sarajevo u 2023. godini (dokaz: vidjeti pod 6.2.), te kreiranju, organizaciji i moderiranju panela pod naslovom ”Kako do boljeg normativnog okvira zaštite potrošača u Bosni i Hercegovini?”, u organizaciji Pravnog fakulteta u Sarajevu u septembru 2024. godine, a uz učešće predstavnika Federalnog ministarstva trgovine, Ombudsmena za zaštitu potrošača, Ombudsmena za bankarstvo FBiH, federalnog Ombudsmena u osiguranju, predstavnika Direkcije za evropske integracije, te predstavnika akademske zajednice, s ciljem iniciranja naučne rasprave o potrebi kreiranja boljeg normativnog okvira zaštite potrošača u BiH – (dokazi: Odluka o imenovanju u Organizacioni odbor, broj: 01-456/24 od 28.03.2024. godine; Program Okruglog stola).

Kandidatkinja je Rješenjem Federalnog ministra trgovine broj: 01-30-1083-1/23 od 16.09.2024. godine, koje podnosi kao dokaz, imenovana u Radnu grupu za izradu Prednacrtu Zakona o zaštiti potrošača pri Federalnom ministarstvu trgovine.

ZAKLJUČNA OCJENA I PRIJEDLOG KOMISIJE

Na konkurs za izbor jednog nastavnika/ice u akademsko zvanje redovnog profesora/ice na naučnoj oblasti Građansko pravo i građansko procesno pravo na Univerzitetu u Sarajevu – Pravnom fakultetu, objavljenom 20.06.2025. godine u dnevnom listu ”Dnevni avaz”, na službenoj

internetskoj stranici Pravnog fakulteta (www.pfsa.unsa.ba), te na službenoj internetskoj stranici Univerziteta u Sarajevu (www.unsa.ba) prijavila se jedna (1) kandidatkinja:

- Dr. Almedina Šabić Učanbarlić, vanredna profesorica na Univerzitetu u Sarajevu – Pravnom fakultetu, na naučnoj oblasti Građansko pravo i građansko procesno pravo.

Odredbom čl. 176 ZVO 2022 članovima akademskog osoblja omogućeno je da biraju da se uslovi za izbor procjenjuju u skladu sa ZVO 2017, konkretno sa uslovima propisanim u čl. 96 st. 1. tač f) tog Zakona. Komisija je uzela u obzir navedeno, te je analizom podnesene prijave i dokumentacije Kandidatkinje utvrdila sljedeće:

1. Kandidatkinja je provela jedan izborni period u zvanju vanredne profesorice

Kandidatkinja je u zvanje vanredne profesorice na naučnoj oblasti Građansko pravo i građansko procesno pravo izabrana 27.11.2019. godine, na period od šest godina, koji ističe 27.11.2025. godine. Procedura za izbor člana akademskog osoblja u isto ili slično zvanje pokreće se najkasnije četiri (4) mjeseca prije isteka izbornog perioda postojećeg člana akademskog osoblja, a najranije šest (6) mjeseci prije isteka izbornog perioda postojećeg člana akademskog osoblja i u skladu s čl. 121 st. 2 ZVO 2022 ne smatra se prijevremenim izborom. Procedura u skladu s čl. 8 st. 1 Uputa o realizaciji izbora u isto ili više akademsko zvanje na Univerzitetu u Sarajevu (broj: 01-15-29/23 od 27.09.2023. godine) započinje objavom konkursa, u kojem se smislu ističe kako je konkurs koji je raspisan 20.06.2025. godine raspisan blagovremeno, pet (5) mjeseci prije isteka izbornog perioda, te Komisija konstatira da Kandidatkinja ispunjava zahtijevani uslov.

2. Kandidatkinja je objavila najmanje osam (8) naučnih radova objavljenih u priznatim publikacijama i dvije (2) knjige

Nakon što je izabrana u zvanje vanredne profesorice kandidatkinja je objavila osam (8) radova, a u pogledu dva (2) je izdata potvrda o prihvatanju rada za objavljivanje, sa naznakom datuma objavljivanja. Svi objavljeni radovi objavljeni su u priznatim publikacijama; oba rada za koja su

izdate potvrde o njihovom prihvatanju za objavljivanje biti će objavljeni u priznatim publikacijama, jedan od njih i kao poglavlje u knjizi koju će objaviti renomirani izdavač Routledge. U tom je smislu Kandidatkinja ispunila uslov koji se tiče objavljivanja minimalno osam naučnih radova u priznatim publikacijama.

Kandidatkinja je nakon izbora u zvanje vanredne profesorice objavila dvije knjige, čime je ispunila uslov za izbor u zvanje vanredne profesorice kojim se propisuje da je potrebno objaviti minimalno dvije knjige.

Od izbora u zvanje asistentice 2005. godine pa do danas Kandidatkinja je objavila dvadeset sedam (27) naučnih radova i četiri (4) knjige, što svjedoči njenoj posvećenosti kontinuiranom naučnoistraživačkom radu. Pri tom Kandidatkinja pored radova i knjiga u užoj oblasti njene ekspertize, koju se primarno vezuje za obligaciono pravo, već od izbora u zvanje više asistentice kontinuirano istražuje i piše u oblasti potrošačkog prava, izuzetno elegantno povezujući teme iz oblasti oblasti obligacionog prava i prava zaštite potrošača. Kontinuirana naučnoistraživačka djelatnost koju u oblasti potrošačkog prava kreira već više od deceniju afirmirala ju je kao stručnjaka čiju se ekspertizu u pitanjima od značaja za zaštitu potrošača prepoznaje i institucionalno, u smislu članstva u Radnoj grupi za izradu Prednacrtu Zakona o zaštiti potrošača u FBiH.

3. Kandidatkinja je ostvarila originalni stručni uspjeh kao što je projekt, patent ili originalni metod

Kandidatkinja je navela podatke o učešću u projektima koji prema mišljenju Komisije predstavljaju originalni stručni uspjeh, te je istovremeno dokazala učešće u Radnoj grupi za izradu Prednacrtu Zakona o zaštiti potrošača u FBiH, u kojem smislu u okviru sastanaka Radne grupe daje izuzetan naučni i stručni doprinos u kreiranju odgovarajućih rješenja koja bi trebala postati dijelom Zakona o zaštiti potrošača.

4. Kandidatkinja je ostvarila uspješno mentorstvo najmanje po jednog kandidata za stepen drugog odnosno integriranog ciklusa studija i trećeg ciklusa studija

Kandidatkinja ispunjava uslov vezan za uspješno mentorstvo jednog kandidata za stepen drugog ciklusa i jednog kandidata trećeg ciklusa studija, imajući u vidu to da je u vremenu nakon izbora u zvanje vanredne profesorice ostvarila ukupno sedam (7) mentorstava na drugom i jedno (1) mentorstvo na trećem ciklusu studija.

5. Rukovodeći se Smjernicama i kriterijima za način vrednovanja uslova za izbore u akademska zvanja, sadržanim u čl. 227 st. 2 Statuta, Komisija je vrednovala i zaključno cijeni da je Kandidatkinja dokazala:

- **nastavničke sposobnosti**, u smislu kvaliteta realizacije nastave na obaveznim i izbornim predmetima na sva tri ciklusa studija, što je potvrđeno rezultatima studentskih anketa i podacima o prolaznosti, kao i zainteresiranošću studenata za izradu završnih radova i doktorskih disertacija pod njenim mentorstvom, te kontinuiranim angažmanima Kandidatkinje u različitim edukacijama pravnika;
- **doprinos procesu internacionalizacije**, kroz učešće na renomiranim međunarodnim naučnim i stručnim konferencijama i recenziranje naučnih radova i knjiga koji se objavljuju u inostranstvu i
- **društveni doprinos**, iniciranjem organiziranja, te samom organizacijom i realizacijom dva značajna naučna skupa, održana na Pravnom fakultetu u Sarajevu u septembru 2023. godine i u septembru 2024. godine, čime je dala primijetan doprinos procesima reforme Zakona o obligacionim odnosima i Zakona o zaštiti potrošača kao zakonima od izuzetnog značaja u širem društvenom kontekstu, kao i učešćem u savjetodavnim tijelima institucija od šireg društvenog značaja.

* * *

Zaključak: Kandidatkinja ispunjava uslov vezan za minimalno osam (8) naučnih radova u priznatim publikacijama objavljenih nako izbora u zvanje vanredne profesorice, s obzirom da je dostavila osam (8) radova i potvrde o prihvatanju za objavljivanje dva (2) rada.

Zaključak: Kandidatkinja je objavila dvije knjige, čime je ispunila uslov vezan za minimalno ***dvije objavljene knjige***.

U smislu naprijed navedenog kandidatkinja je prezentirala dokaze kojima dokazuje nastavničke sposobnosti, društveni doprinos i doprinos procesu internacionalizacije.

Iz priloženih rezultata anketa proizlazi zaključak o tome da je Kandidatkinja u izvođenju nastave na obaveznim i izbornim predmetima na I i II ciklusu studija ocijenjena najvišom ocjenom, uz dodatne pohvalne komentare anketiranih studenata. Iz podataka o nastavnom opterećenju Kandidatkinje vidljivo je nastavno opterećenje od stotinu i trinaest (113) sati predavanja na godišnjem nivou i sedamdeset (70) sati vježbi na godišnjem nivou. Nastavničke aktivnosti Kandidatkinja dokazuje i brojem mentorstava na II ciklusu studija, mentorstvom na III ciklusu studija, članstvima u komisijama za završne radove na II ciklusu i određenim brojem imenovanja za članicu i predsjednicu u komisijama za ocjenu i odbranu doktorskih disertacija, kao i ponovljenim angažiranjem za edukatoricu u okviru programa edukacije za polaganje pravosudnog ispita, te edukacije zaposlenih u privredi.

Doprinos procesu internacionalizacije Kandidatkinja dokazuje učešćem u nizu značajnih međunarodnih naučnih i stručnih skupova, kao i recenziranjem naučnih radova izdatih u inostranstvu.

Kandidatkinja je iniciranjem organiziranja, te samom organizacijom i realizacijom dva značajna naučna skupa, održana na Pravnom fakultetu u Sarajevu u septembru 2023. godine i u septembru 2024. godine dala primijetan doprinos procesima reforme Zakona o obligacionim odnosima i Zakona o zaštiti potrošača kao zakonima od izuzetnog značaja u širem društvenom kontekstu, a naglašeni društveni doprinos vidljiv je i u angažmanu Kandidatkinje u radu na Prednacrtu Zakona o zaštiti potrošača u FBiH.

Uzimajući u obzir sve navedene činjenice i dokaze prezentirane od strane Kandidatkinje, Komisija jednoglasno zaključuje da Kandidatkinja dr. Almedina Šabić Učanbarlić ispunjava sve uslove za izbor u akademsko zvanje redovna profesorica propisane ZVO 2017.

Shodno tome, Komisija upućuje Vijeću Univerziteta u Sarajevu – Pravnog fakulteta

PRIJEDLOG

da se dr. Almedina Šabić Učanbarlić izabere u akademsko zvanje redovna profesorica na naučnoj oblasti Građansko pravo i građansko procesno pravo na Univerzitetu u Sarajevu – Pravnom fakultetu.

KOMISIJA:



Prof. dr. Abedin Bikić, Predsjednik



Prof. dr. Meliha Povlakić, članica



Prof. dr. Zinka Grbo, članica